

# SARS E AMOHETSE DIKOPO TSE FETANG 88 000 TSA MOSEBETSI

Tshwane, Labone la 15 Mmesa 2021 – Ditshebeletso tsa Lekgetho tsa Afrika Borwa (SARS) di kgotsofaditswe ke karabelo ya dikopo tsa yona tsa mesebetsi e fapaneng tseo sepheo ka tsona e leng ho ntlafatsa bokgoni ba rona le ho ntlafatsa tshebeletso ya rona ho balefalekgetho mmoho le ho ntlafatsa boikobelo ba tefo ya lekgetho.

Dikgeo tsena tse ileng tsa bapatswa di akaretsa dibaka tse ngata tsa tshebetso ya SARS, ho akareditswe le tsa *Information Technology Specialists, Data Management Specialists, Audit and Risk Specialists, Investigations Specialists* le *Auditors* tse tsepamisitseng maikutlo hodima merero e mabapi le ho Qoba Lekgetho, mmoho le mekgahlelo e meng e mengata.

SARS e makaditswe haholo ke paloyohle ya dikopo tse 88009 tseo e di fumaneng. Tse 15092 ho tsena ke dikopo tsa ka hare. Boemo ba tlhokeho ya mesebetsi ka hara naha bo hlakisa diphephetso tseo re tjamelaneng le tsona re le naha. Ena ke qholotso eo rona bohle jwalo ka Maafrikaborwa re tlamehang ho tobana le yona le ho e fenyha. SARS e tla kgatha ya yona tema, empa ka bomadimabe re tla kgona feela ho nka bakopi ba 500 ho tla re thusa ho aha setjhaba sa rona ka hara mokgatlo wa rona.

SARS e kgolwa hore ha se mmuso ka boona feela o tlang ho theha mesebetsi mme re tshepa hore ba bang, haholo lekala la praevete, le lona le tla etsa tsohle tse matleng a lona ho thusa haholo baithuti ba sa tswa fumana mangolo a bona, monyetla wa ho iqalla bophelo ka ho be neha menyetla ya ho ithuta mesebetsi, mme moo ho kgonehang, le ho ba hira e le letshwao la boinehelo ba rona bohle ba ho theha bokamoso bo tjhatsi le hore ba qale bophelo hantle.

Ka kakaretso, ho bile le dikopo tse 468 (ka hare le ka ntle) bakeng sa mekgahlelo ka mong wa mesebetsi. Paloyohle ya dikopo, tse 7946 ke tse tswang ho baithuti ba sa tswa fumana mangolo a bona, ha tse 755 e bile tse tswang ho di-*Chartered Accountants*. Ho bile hape le palo e kgolo ya bakopi ba nang le mangolo a thuto e phahameng a kang a Masters le PhD.

Jwalokaha dipalo tse na di bontsha, naha ya rona e na le mothamo o moholo wa batho ba nang le boitsebelo ba mekgahlelo e fapaneng moo beng ba mesebetsi ba ka lebang teng ho thusa naha ya rona ho lwantshwana le diphephetso tsa bofuma, ho hloka mesebetsi le ho se lekane. Kaofela ha rona re tlameha ho arabela qholotso ena.

Letsatsi la ho qetela ebile la 11 Mmesa 2021. SARS e tla tswela pele ka metjha ya ho thaoha ka ho ikopanya le bao ba kgethetsweng hore ba tle ba nonngwe maikutlo feela. Ditshebeletso tsa Lekgetho tsa Afrika Borwa di lakatsa ho leboha Maafrikaborwa ka tshehetso le tshepo ya bona setheong sena.

Ho na le dikgeo tse mmalwa tsa mesebetsi moo ho sa fumanwang dikopo tse lekaneng. Ka lebaka la sena, dikgeo tsena di tla boela di bapatswa hape karolwaneng ya rona ya tsa mesebetsi websaeteng ya rona ya SARS. Batho ba nang le kgahleho ba kgothaletswa ho etela kgokanyo e bitswang *Careers* ho [www.sars.gov.za](http://www.sars.gov.za).